

Meeqqanut tapiissutit pillugit Namminersorlutik Oqartussat nalunaarutaat nr. 19, 18. oktober 2012-imeersoq Atuussimasoq (Historisk)

Meeqqanut tapiissutit pillugit Inatsisartut inatsisaanni nr. 9, 7. december 2009-meersumi § 4, imm. 3, § 6, imm. 5 aamma § 10, imm. 2 naapertorlugit aalajangersarneqarpoq:

Kapitali 1

Isertitassatut naatsorsuutigisat naatsorsorneqartarnerat

§ 1. Isertitassatut naatsorsuutigisat ukiumut tapiissuteqarfiusussamut ataatsimut imaluunniit ukiup tapiissuteqarfiusussap ilaata sinneranut naatsorsorneqassapput. Inuup inuilluunniit isertitaat meeqqanut tapiissutinik tunniussinissamut tunngaviusut malillugit isertitassatut naatsorsuutigisaasut tamarmik naatsorsuinermi ilanngunneqartassapput.

§ 2. Ukiumi tapiissuteqarfiusumi imaluunniit ukiup tapiissuteqarfiusup ilaata sinnerani aningaasarsiassatut A-tut naatsorsuutigisat naatsorsorneqarneranni, aningaasarsiat A-t tamarmiusut ukioq naallugu isertitanngortinneqarnerat aallaavigalugu naatsorsorneqassapput.

Imm. 2. Ukiumi tapiissuteqarfiusumi imaluunniit ukiup tapiissuteqarfiusup ilaata sinnerani aningaasarsiassatut B-tut naatsorsuutigisat naatsorsorneqarneranni, ukiumi isertitanik naatsorsuiffiusumi kingullermi aningaasarsiat B-t tunngavigineqassapput, taamaassanngilarli inuup B-nik aningaasarsiaqarsimasup uppersarsinnaappagu, nammineerluni inuussutissarsiutigisap atorunnaarsimasup, annikillingaatsiarsimasup imaluunniit allatut allanngortinneqarsimasup nassataanik aningaasarsiaasut. Allannortoqarsimanera pissutigalugu ukiumi isertitanik naatsorsuiffiusumi kingullermi aningaasarsiat B-t atorneqarsinnaanngippata, aningaasarsiat B-t akileraarusigassaanngitsut sinnerlugit B-tut aningaasarsiaasimasut tamaasa aallaavigalugit isertitat naatsorsorneqassapput. Naatsorsukkat ukioq naallugu isertitanngortillugit aaqqinneqassapput.

Imm. 3. Isertitassatut naatsorsuutigisani inummut ilanngaat ilanngaatigineqarpat, isertitassat akileraaruserneqartussaasut meeqqanut tapiissutinik tunniussinissamut tunngaviusut takuneqarsinnaanngussapput.

Imm. 4. Ilangaatit tassaasinnaapput inummut ilanngaat imaluunniit akileraaruteqaataasussanit ilanngaat. Ilangaat iluanaarutaanerpaasusaaq toqqarneqassaaq.

Kapitali 2

Isertitat annertuumik ataavartumillu allannguuteqarnissaat naatsorsuutigineqarpat meeqqanut tapiissutinik tunniussinissaq

§ 3. Isertitat akileraaruserneqartussat pissutsit allanngornerannik pissuteqartumik ukiup ingerlanerani annertuumik ataavartumillu allannguuteqarpata, allannguutitut naapertuuttumik meeqqanut tapiissutit naleqqussarneqassapput.

Imm. 2. Meeqqanut tapiissutit annertussusissaat atuuttoq naapertorlugu allannguut tapiissutit allanngornerannik kinguneqarpat, isertitat akileraaruserneqartussat annertuumik allanngussapput.

Imm. 3. Isertitat akileraaruserneqartussat ataavartumik allanngorsimassapput, isertitat tamakkiisumik ilaannakortumilluunniit meeqqanut tapiissutinik tunniussinissamut tunngaviusut ilaatinneqarunnaarpata, assersuutigalugu toqkkut qimagunneq, soraarnerussutisiaqalerneq, averuserneq, avinneq aappariikkunnaarnerluunniit pissutigalugit. Pissutsit sivikitsumik allannguuteqatsiarnerisa kingunerannik isertitat allannguuteqarnerat ataavartumik allannguutitut isigineqanngillat, tassa meeqqanut tapiissutinik allannguissamut pisinnaatitsisumik. Pissutsit sivikitsumik allannguuteqatsiarnerat imatut paasineqassaaq, piffissaq qaammatit pingasut missaannik sivilissuseqartoq taakkuninngaluunniit sivikinnerusoq.

Imm. 4. Pissutsit allanngorneri pillugit paasissutissat kommunimit pissarsiarineqareernerisa kingorna meeqqanut tapiissutit qaammatip aallaqqaataanit atuuttussanngorlugit naatsorsoqqinneqassapput. Imm. 1 naapertorlugu allannguutitut pillugit paasissutissat meeqqanut tapiissutinik qaffaanermik nassataqartussat, allannguuteqarnermit kingusinnerusumik kommunimit pissarsiarineqarpata, meeqqanut tapiissutit allanngortoqarneranit atuuttussanngorlugit naatsorsorneqassapput, kukkuneq tapiissutisinnaatitaasup nammineerluni kukkuneranik tunngaveqanngippat.

Kapitali 3

Meeqqanut tapiissutit tunniunneqartarnerat, tassunga ilanngullugu ukiukinnerusunut tapiissutinik tunniussisarneq tapiissutinillu aqutsineq pillugit maleruaqqusat

§ 4. Meeqqanut tapiissutit qanoq tunniunneqartarnissaat kommunip aalajangertassavaa, piumasarisinnaallugulu tapiissutinik tiguisussap aningaaserivimmi assigisaaniluunniit tapiissutit ilineqarfigisinnaasaannik kontomik nalunaaruteqartoqarnissaa.

§ 5. Angajoqqaat najugaqatigiippata, meeqqamut tapiissutit angajoqqaat katillutik isertitaat akileraaruteqaataasussat aallaavigalugit tunniunneqassapput. Tamanna atuuppoq angajoqqaat katissimappata inooqatigiippatalu, taamaattoqassappallu piunnaasaqataannilaq inooqatigiinneq sivikinnerpaamik ukiumik ataatsimik sivilissuseqassasoq, tassa inatsisit malillugit angajoqqaat marluullutik meeqqamut pilersuisussaammata.

Imm. 2. Meeraq angajoqqaami arlaanni najugaqarpat, taassuma isertitai akileraaruteqaataasussat

aallaavigalugit meeqqanut tapiissutit tunniunneqassapput. Angajoqqaap taassuma meeqqap angajoqqaarinngisaa alla katissimappagu, katissimasaata isertitai akileraaruteqaataasussat ilanngunneqassapput. Angajoqqaq taanna meeqqap angajoqqaarinngisaanik allamik inooqateqarpat, inooqatigisaata isertitai akileraaruteqaataasussat ilanngunneqassapput, inooqatigiinneq sivikinnerpaamik ukiumik ataatsimik atuussimappat.

§ 6. Meeqqanut tapiissutinik tunniussinermi tapiissutinik tiguisoq ilisimatinneqassaaq, meeqqanut tapiissutinik tunniussinissamut piumasaqaatit pillugit aamma naatsorsuineri tunngaviusussat pillugit. Aamma tapiissutinik tiguisoq ilisimatinneqassaaq, pissutsit allanngornerini paasissutissiisussaataaneq pillugu, meeqqanut tapiissutinik tunniussisaannarnissamut pingaaruteqarmat.

Imm. 2. Kommunit allamut nuunnermi, kommuni nuuffigineqartoq paasissutissanik tapiissutit annertussusissaannik naatsorsuinissamut pisariaqartinneqartunik pissarsiniassalluni pisussaavoq. Kommunit nuuffigineqartup paasissutissat suliamut attuumassuteqartut inunnik nalunaarsuiffimmut akileraartarnermillu ingerlatsivimmut pissarsiariniassavai. Paasissutissat amigaateqarpat paasissutissanik allanik pissarsiniartoqassaaq.

Imm. 3. Meeqqanik tapiissutinik tiguisartup pisussaaffigivaa, pissutsit tamaasa meeqqanut tapiissutit annertussusissaannik naatsorsuisarnermut pingaaruteqartut kommunit paasissutissiisutigissallugit.

Imm. 4. Uppernarsaatit paasissutissallu meeqqanut tapiissutit ukiumoortumik aalajangersarneqartarnerannut imaluunniit naatsorsoqqinneqartarnerannut pingaarutillit, taakkununga ilanngullugit, maannakkut isertitat annertussusaat, ilanngaattissat naatsorsuutigisat annertussusaat imaluunniit isertitat ilaasa atorunnaarsinnaanerit pillugit uppersnarsaatit kommunit ilaatigut qarasaasiatigut piumasarisinnaavai.

§ 7. Inatsisip § 5-iani maleruaqqusat naapertorlugit meeqqanut tapiissutit meeqqamut iluaqutaanngitsut uppersnarsarneqarpat, kommunit aalajangersinnaavaa, meeqqanut tapiissutit aqussallugit imaluunniit tapiissutit tamakkiisumik ilaannakortumilluunniit inuussutissanngoreerlugit tunniunneqartassat. Tunniusserit nioqqutissanik pisissutissanngorlugit (rekvisition) pisassapput. Aningaasat amerlanngitsut, immaqaa naafferartumik, tapiissutinik tiguisinnaatitaasumut aningaasanngorlugit tunniunneqartarsinnaapput.

Imm. 2. Kommunit aalajangerpagu, meeqqanut tapiissutit tamakkiisumik ilaannakortumilluunniit meeqqamut efterskolemi, skolehjemmemi assigisaanniluunniit najugaqartumut tunniunneqassat, meeqqap pilersorneqarnissaanut aningaasartuutit sorliit tapiissutitigut matussuserneqarnissat pillugu ataatsimoortumik takussutissaliortoqarsinnaavoq.

Imm. 3. Aningaasartuutissanut takussutissat imm. 2-mi taaneqartut sapinngisaaq tamakkerlugu meeqqanut tapiissutinik tiguisinnaatitaasoq suleqatigalugu suliarineqassapput.

Kapitali 4

§ 8. Kommuniq ilimagilluinnarpagu meeqqanut tapiissutiniq tigusiussap piunasaqaatit naammassisinnaanngikkai, taava kommuniq pineqartoq qinnuigissavaa, suliaasat piviusut kommuniq isumaanik allanngortitsisinnaasut uppersassagai.

§ 9. Paasissutissaniq kommuniq meeqqanut tapiissutiniq naatsorsuineru atugassaanik piaraluni nipangiussineru, eqqunngitsuniq paatsiveerutsitsisinnaasumilluunniit paasissutissiineru imaluunniit allatut piaraluni paasissutissaniq tunniussinnginneru politiinut unnerluutiginnittoqassanersoq pillugu kommune naliliisinaavoq.

Kapitali 5

Atortuulersitsineq

§ 10. Nalunaarut manna 1. november 2012 atortuulersinneqarpoq.

Imm. 2. Peqatigitillugu Meeqqanut tapiissutit pillugit Namminersornerullutik Oqartussat nalunaarutaat nr. 38, 19. december 1996-imeersoq atorunnaarsinneqarpoq.

Namminersorlutik Oqartussat, 18. oktober 2012

Mimi Karlsen

/

Lise Lennert Olsen